

BONERIANO®

Koko tin tres
wowo, ma e ta
yora na unu so..

EDITOR:
Bonaire Communication Services N.V.

Djabièrnè 13 òktober 2023 | Preis: \$1.25

INSIGURIDAT DEN AIRE

Impreshonante parada di bandera



Djárason alrededor di Malecon tabata kargá ku hende i bandera pa kana yega na e esenario prinsipal pa apertura di Festival di Regata 2023. Masha hopi hende a forma parti di e parada i despues a subi esenario prinsipal na altura di Parke Wilhelmina. Bunita bista pa mira e diferente nashonalidatnan i nan bandera den e parada.



Pa klousura Siman di Diversidat

RCN ta hisa bandera di arko íris

KRALENDIJK -- Den e siman tras di lomba, e grupo di trabou diversidat i inklushon, a tene un Siman di Diversidat den kual e tema ‘Diferensia ta en-rikesé’, tabata sentral.

Durante e siman a tene diferente aktividat pa enfoká riba diversidat, ka-

minda a para ketu na e dife-rensianan entre nos, pero tambe na loke netamente ta konektá nos.

Direktor di RCN, Tim Muller: “Mi ta haña importante ku e gobièrnu, meskos ku e poblashon di nos islanan, ta konsistí di diferente persona. Asina ta ku nos ta

diferente den orígen, sekso, religion, edat, identidat, ku tin lugá pa hende ku un limitashon. I pa mi, diversidat ta bai man den man ku inklushon, no solamente partisipá, sino tambe ta na altura, partisipá den desishonnan. Diferensia ta tres aun mas forsa.”



Bon idea pa aploudí

KRALENDIJK -- Bon idea pa aploudí, Kaya Isla Riba na e momentu akí ta den proseso pa renobashon.

Pues outo no por pasa riba e kaminda i pa hende por hasi uzo di dje, a pone

algun tabla na suela.

Sigur bon idea i por mira ku hendenan ta hasi bon uzo di dje.

E ta di nesario sigur e siman akí kaminda hopi hende ta bai hasi uzo di e kaya.



Oumento mínimo sosial no ta alkansabel yanüari

KRALENDIJK – Tur kos ta musta ku ta introdusí e mínimo sosial na Karibe Hulandes pa mas tardá promé di yüli otro aña. Durante e debate di djáron tokante e presupuesto di SZW, miembro di Tweede Kamer, Don Ceder di ChristenUnie, a konstatá ku esaki no ta alkansabel.

E organisashon di

konsumidó Boneriano, UnKoBon, tambe ta sali for di e punto di bista. Den un komunikado di prensa e siman akí, e organisashon ta urgi pa bini lihé ku un grupo di trabou ku e enkargo pa tuma medida pa promé ku zomer di 2024 ainda implementá e mínimo sosial.

EXECUTIEVERKOOP

Op dinsdag 17 oktober 2023, om 10:00 uur, vindt een openbare verkoop plaats.

aangeboden: **2 Motorvoertuigen**
(**1 Mitsubishi Montero en 1 Toyota Betta**)

De motorvoertuigen zijn 30 minuten vóór de verkoop voor één ieder te bezichtigen. De verkoop, in opdracht van de ontvanger van de Belastingdienst Caribisch Nederland vindt plaats op het adres: **Kaya Macario Cai Sint Jago #129 (Nikiboko)**

Belasting deurwaarder belast met de executie
Melushkalin A. J. Thomas



Pronóstiko di tempu pa Boneiru

Djaweps 12 te Djabièrnè 13 Òktober 2023

Parsialmente nublá i predominantemente seku

Ta leve te parsialmente nublá i predominantemente seku. E temperatura máksimo lo ta aproksimadamente 33°C, e temperatura mínimo mas o ménos 28°C. E bientu ost ta moderá, forsa 4, de bes en kuando basta fuerte, forsa 5.

Altura di ola: 1.5-2.0 m (4-6 pia), ku lo disminuí te aproksimadamente 1.5 m (3-5 pia) den kareda di djabièrnè.

* Altura di ola válido pa laman grandi

Popularidat ta relativo

P'esei un propio estilo

No solamente pa ta eksitoso

Sino sigur mas balioso

Brò Kès 93.5 FM

pokopoko pero sigur mas i mas hende ta ...

Skuch'è



Telefon/ WhatsApp +599 701 0935

www.radio935bonaire.com

Pilotnan muchu kansá òf malu pa bula

INSIGURIDAT DEN AIRE

KRALENDIJK – Pilotnan i personal di kabina di kompanianan di aviashon ku ta bula barata na Europa, ta sinti nan mes hopi biá obligá pa bula sí nan ta sinti nan mes kansá òf malu, e programa di investigashon Zembla, ta informá. Esaki ta kondusí na situashonnan peligroso den aire. Pilotnan regularmente lo mester ta pega soño durante buelo i bati alarma parse ta difísil.

Zembla a puntra 30 pilot i personal di kabina di e kompanianan bringadó di preis. “Direpente mi a ripará ku mi wowonan a sera. Momentu ku mi a habri wowo, mi a mira mi kolega tambe ku wowo será,” un di nan a bisa.

E personal hopi biá tin kontraktan fleksibel, loke por nifiká ku nan ta haña pagá solamente sí nan bula, òf tin ménos bon derecho na momentu di retiru.

Nan ta haña atvertensia sí nan mèldu malu òf ta kansá i p’esei ta mira nan mes obligá pa tòg bula for di miedu ku nan ta pèrdè nan trabou.

“Bo ta spera ku nada bai robes, pasobra den e estado akí bo no por garantisá bon resultado.” Un



otro pilot ta bisa. “Bo ta gewon muchu kansá.”

Atrobe un otro pilot ta konta: “Nos lo mester bai aterisá dentro di algun minüt. E personal di kabina ta bini den cockpit pa puntra nos sí nos tin mester di algu, momentu ku e porta a habri e ora ei mi a lanta.”

Miembronan di personal tin miedu pa entregá keho, òf papia liber, segun Zembla. Mayoria di nan a papia ku e programa a base di nan anonimidad.

Ofisina di prensa ANP, a puntra kompanianan di aviashon ku ta bula barata pa reakshoná riba e konklushonnan di Zembla. Transavia i Easyjet ta bisa ku nan no ta rekonosé e señalnan akí. Ryanair i Wizz Air, ainda no a reakshoná.

Miedu pa pèrdè trabou

E programa di investi-

gashon a trese dilanti tambe ainda un investigashon di e universidat Sueko Karolinska, pa kua a puntra 10 mil pilot, stewardess i steward den Europa. For di esaki a bini dilanti ku 29 porshento di e personal di kabina puntrá i 36 porshento di e pilotnan, ta haña ku e siguridat den aire a empeorá desde e pandemia di Corona. A puntra miembro di personal di tur tipo di kompania pa e investigashon.

Banda di esei, a sali na kla ku 80 porshento di e personal di kabina puntrá i 66 porshento di e pilotnan, ta haña ku e sirkunstansianan di trabou a empeorá. I e sirkunstansianan di trabou pues ta bai a kosto di e siguridat den aire, investigadó di e universidat Sueko Marika Melin, a bisa.

“Sí bo tin muchu miedu pa pèrdè bo trabou, pa

gana ménos plaka, bo ta inkliná pa tòg bai bula. Tambe sí en realidat bo no mester hasié.”

Ofisialmente e personal mester mèldu momentu ku nan ta sinti nan mes 'unfit to fly' i no ta den estado pa ehekutá nan trabou seif, pero e ora ei algun dunadó di trabou ta obligá nan, Zembla ta bisa a base di e miembronan di personal puntrá. Na algun kompania tin un kultura di miedu, un di e fuentenan a bisa.

Drumi tiki

E konklushon di Zembla ta kuadra ku un investigashon ku a hasi riba enkargo di European Cockpit Association ku a sali luna pasá. E investigadónan a puntra 6900 pilot den Europa, tres kuart di nan a bisa ku durante e último kuater simannan por lo ménos un biá nan a pega soño durante buelo.

Mas di 70 porshento a bisa ku nan tin insufisiente tempu pa sosegá entre buelo.

A notifiká tipo di mal entendimentu asina den aviashon mas biá. Na 2012 KRO Reporter a trese na kla kon pilotnan di Ryanair ta keda poné bou di preshon pa usa ménos kombustibel ku ta

pa traha momentu ku nan ta malu.

“Despues e tempu ei poko a kambia,” Camiel Verhagen di Vereniging Nederlandse Verkeersvliegers, a bisa Zembla. En realidat bo por bisa ku a bira mas serio riba serto aspekto. E ta manera un mancha di zeta plamá na mas kompania di aviashon.

E último añanan netaamente ketu bai mas pasahero ta skohe pa kompanianan ku ta bula barata, e organisashon di aeropuerto, ACI Europe, a indiká anteriormente e aña akí. “Tur hende sa ku en realidat bo no por bula pa 59 euro pa Barcelona, pero tòg e ta sosodé,” Annette Groeneveld di e sindikato European Cabin Crew Association, a bisa Zembla.

“E avion, kombustibel i derecho di aterisahe, ta kosta loke e ta kosta.

E ora ei ta e úniko bèrdat ku nan ta pone preshon riba e personal.”

E supervisor Europeo riba siguridat di aviashon, EASA, ta yama e notifikashonnan tokante e rísiko di siguridat tambe insufisientemente serio, e sindikatonan Europeo ta bisa tokante e personal di aviashon.

Tin falta di supervishon den esaki.

Oumento salario mínimo ta kosta 9 mion

KRALENDIJK – E oumento di e salario mínimo i e kompensashonnan konektá kuné na Karibe Hulandes, ta kosta Reino 9 mion euro anualmente. Esaki e minister pa maneho di pobresa, Carola Schouten, ta kontestá pregunta di Tweede Kamer. E ta agregá ku den

e presupuesto no tin koubertura.

Komishon Thodé a konsehá pa subi e salario mínimo riba e islanan entrante promé di yanüari na 1.750 dòler i na mes momentu kuné kubri e oumento di gastu pa dunadónan di trabou ku un maneho flankiá. For di reakshon di Schouten ta

indiká ku e gabinete no ta planiá pa sigui e konseho di Komishon Thodé.

E yabi ta den man di Parlamento ku ainda por urgi pa tòg oumento e salario mínimo ku 1.750 entrante promé di yanüari, pero mesora mester bira kla sí tambe kon ta bai finansiá esaki.

EXECUTIEVERKOOP

Op dinsdag 17 oktober 2023, om 10:00 uur, vindt een openbare verkoop plaats.

aangeboden:

motorvoertuig Isuzu pick-up enkele cabine

De motorvoertuig is 30 minuten vóór de verkoop voor één ieder te bezichtigen. De verkoop, in opdracht van de ontvanger van de Belastingdienst Caribisch Nederland vindt plaats op het adres: **KAYA TOTOLIKA 1 (NIKIBOKO)**

Belasting deurwaarder belast met de executie
SEDNEY E. SINT JAGO

Miss Bonaire a yega Vietnam

KRALENDIJK -- Miss Bonaire Ruby Pouchet, despues di a sali di biahe pa Vietnam dia 1 di òktober, a yega i a agregá na e kompetensia di Miss Grand Internashonal 2023. Un di e sertámennan mas grandi na mundu, kompará ku kaliber di Miss Universo i Miss Mundu.

Den un siman di tempu Miss Bonaire a sòru di promové Boneiru i pone nòmber di Boneiru zona rònt mundu.

Miss Bonaire Ruby Pouchet ta halando aten-

shon di vários media rònt mundu ku tin nòmber di Boneiru haltu den nan lista di faborito pa e korona di oro di Miss Grand Internashonal 2023.

Asina Miss Bonaire Ruby Pouchet ta skor keda haltu i ta un di e favoritonan den e trayekto i aktivitatnan di Miss Grand Fashion Show, Miss Grand Best Gala Dinner Presentation, mihó den trahe típiko Vietnemes i muchu mas

Miss Ruby Pouchet tin 2 siman mas di aktivitat ku ta enserá filmamentu i

sakamentu di potrèt i algun show di kua mihó den trahe di baño, mihó den trahe nashonal, mihó den entrevista, promé ku e evento kulminá den e show final dia 25 di òktober.

Durante e siguiente dos simannan binidero, Boneiru i mundu kompleto por sigui e trayekto di Miss Bonaire Ruby Pouchet riba media sosial di Facebook i Instagram i alaves tin retonan kual Miss Bonaire ta konta ku sosten i voto di Boneiru i hermana islanan.

E medionan sosial ku por

sigui pa mas aktualisashon i material di Miss Bonaire i pa vota like, ta Facebook i Instagram di Missgrandinternational i esun di Missbonaireorganization.

Alaves di parti di Rodrick Beaumont, presidente

di Miss Bonaire Organization i Miss Bonaire Ruby Pouchet, danki na esnan ku a kontribuí ku desaroyo, preparashon, biahe i partisipashon di Miss Bonaire na e evento di Miss Grand Internashonal.



OX & WOLF LEGAL PARTNERS

BANKAROTA

Korte di promé instansia di Boneiru, Sint Eustatius i Saba den su desishon di dia 10 di òktober 2023 a pronunsiá e bankarota di e kompania **BONAIRESUN B.V.**, aktuá bou di e nòmber di **"Kings of Ribs"**, promé establecí na Kaya Grandi 31, Boneiru, i a apuntá mr. J.R. Veerman komo hues di instrukshon i mr. M.D. van den Brink komo curator.

Akreedónan ta wordu invitá pa entregá nan demanda serka e curator pa verifikashon.

mr. M.D. van den Brink

OX & WOLF legal partners

Kaya Grandi 43b
Kralendijk, Bonaire
T: +599 796 6943
E: brink@ox-wolf.com
W: www.ox-wolf.com

JRA Schoonmaakbedrijf B.V. ta buska

1 installatie-monteur

- mester tin 1 aña di eksperensia

Pa mas inf. yama telefòn # **785-9041**

Eklipse parsial di solo

KRALENDIJK -- Djasabra dia 14 di òktober tin un asina yamá eklipse anular di solo, ku na Boneiru sinembargo solamente ta visibel komo un eklipse parsial di solo. Den e kaso akí, kasi 61% di solo ta kubrí dor di luna na e punto kulminante di e eklipse.

Un eklipse anular ta sosodé ora luna krusa mei mei di solo i mundu i asina blòkia e bista di solo, sea total òf parsial. E último biá ku por a eksperensia esaki na Boneiru tabata na 1998. Dia 26 di febrüari 1998,

pueblo i e hopi bishitante, a eksperensia un eklipse total di solo. Esaki ta algu ku mayoria hende por eksperensia solamente un biá den nan bida, sí nan tin suerte.

E dia ei a kuminsá hopi nublá, pero banda di 12'or di mèrdia, kasi tur nubia a dispersé i Boneiru por a kuminsá prepará pe momentu ku luna a kuminsá tapa solo.

E kuminsamentu di e parti parsial di e eklipse ei a sosodé 12:40 i gradualmente mas i mas di solo tabata tapa dor di luna.

E punto kulminante di e eklipse total a yega 14:12 i a dura mas ku dos minüt i mei. Ora ku solo a kuminsá aparesé atrobe despues di 14:14, tur hende mester a kore bisti e breñan spesial pa eklipse di solo bèk, pa asina protehá nan wowo kontra di e rayonan fuerte i potencialmente peligroso di solo.



Mas ku un ora despues, 15:37, solo tabata bria manera kustumber atrobe i asina a yega un fin na un fenómeno tremendo, ku kasi tur hende lo keda kòr-

da pa sobrá di nan bida.

Djasabra 14 di òktober, e eklipse ta kuminsá mèrdia 12:47 aki na Boneiru i ta yega su punto máksimo 14:30. Na e momento ei kasi 61% di solo ta kubrí dor di luna. E fenómeno akí ta kaba 16:05.

Seguridat ta sumamente importante na e evento. E

eklipse solar parsial ta un espektakular asombroso, pero sumamente peligroso pa mira direktamente. Ta supliká pa tur hende ku kier mira e eklipse solar parsial, pa bisti solamente breñan ISO sertifiká spesialmente diseñá pa mira eventonan asina. Tambe ta rekomendá pa remplasá breñan bieu.



RISKA PIDI LO EKSTRAORDINARIO

Skritura: 1 Krónikanan 4:9,10(BS)
 "... I Dios a dun'é loke ku el a pidi." vers. 10

Bo a yega di pidi Dios algu ekstraordinario den orashon? Manera; laga awe dura mas largu pasobra mi ke kaba algu importante òf mi mester di èkstra forsa pa kumpli ku un tarea. Esakinan ta petishon ku Josue i Samson a hasi i Dios a kontestá.

Akaso nos orashonnan falta sinseridat òf mas detaye òf mas fe?

Jabes tabata un hòmber manera abo i ami i el a roga Dios ku fe pa kosnan

ekstraordinario apesar di su situashon.

El a invoká Dios i a pidi'É pa:

-Bendishon'é di bèrdat (e kier a biba e bendishon spiritual den Kristu) – Efesionan

1:3

-Hasi su teritorio mas grandi (e kier a hasi mas kos pa su Dios segun su fe ta

krese) – 2 Korintionan 10:14-16

-Ku Dios Su man lo ta kuné (e kier a sobresalí pa Dios) – Esdras 7:6,9 i 28

-Ward'é di malu (el a konfia ku Señor ta proteh'é) – 2 Timoteo 4:17,18

Ta petishonnan hopi profundo, ma Jabes tabata spesífiko ku Dios i mas importante, el a konfia ku Dios ta kontestá su petishon.

Abo i ami tambe ta sirbi mesun Dios serka Kende nos por yega ku un kurason sinsero i konfia ku E ta skucha i ta duna nos loke nos pidi.

Orashon: Tata, yuda mi pa ta habrí, sinsero, spesífiko ora mi ta presentá mi mes serka

Bo i tambe yen di konfiansa sperando e kontesta.

I Dios ta duna loke ku bo pidi!

Gilda Beukenboom-Sintjago
Produkshon PGM

Programanan di Bonaire.tv

TELBO kanal 70
 Flamingo TV kanal 23

Djabièrnè 13 òktober 2023

12.00 Herensia Aruba:	Harry Croes
13.00 Aki Boneiru:	Ohochi Abrahams
14.00 Herensia Korsou:	Efrain (Frank) Martis
15.00 BAPA:	Henry Tore
16.00 Aktualidat:	Adoptiegrootouder MBO - Yùfrou Suzy Bergland
17.00 Aki Boneiru:	Cris Statie
18.00 Herensia:	Estebana Nelly Clarinda-Kock
19.00 BAPA:	Gerald Alberto
20.00 Herensia Aruba:	Famia Ranis
21.00 Aki Boneiru:	Edson Frans 'Mashin di planta mata
22.00 Herensia:	Jocelyn Arndell y George Violenus
23.00 BAPA:	Ethsel Pieternella

Tur mèrdia 12'or ta kuminsá un programashon nobo di 4 ora.

E programashon aki ta ripití pa 24:00.



Siensia tras di protekshon di para

DCNA a lansa proyekto nobo **Monitoreo pa konservashon di biodiversidat di para**

KRALENDIJK -- Pa medio di un kombinashon di entrenamentu mehorá, investigashon den vèlt i uso di un programa di monitoreo standarisá, awor organisashonnan lokal di maneho di naturalesa por aportá mas mihó na monitoreo i protekshon di populashon di para i alrededor den área karibense.

Ku e proyekto nobo akí, Dutch Caribbean Nature Alliance (DCNA), ke ekipá e organisashonnan di maneho di naturalesa Fundacion Parke Nacional Aruba (FPNA), Stichting Nationale Parken Bonaire (STINAPA), Caribbean Research and Management of Biodiversity (CARMABI), Saba Conservation Foundation, St. Eustatius National Parks (STENAPA) i Nature Foundation St. Maarten, ku e hèrmèntnan pa aktivamente monitoriá populashon di para i analisá e informashonnan.

E proyekto akí ta mas ku solamente akumulá informashon, e ta un iniciativa dinámiko, impulsá sientífikamente i ku nan a diseñá pa hasi análisis amplio i interkambio di konosementu posibel i pa brinda

komprenshon tokante salú di e ekosistemanan lokal.

E proyekto a ranka sali e aña akí i ta kontinuá te den e promé kuartal di aña 2028. Ministerio di Agrikultura, Naturalesa i Kalidat di Kuminda, ta finansiá e proyekto i Nationale Postcode Loterij ta finansiá e aktividatnan di DCNA.

Salú ekológiko

Para ta ofresé un lèns úniko atraves di kua e parkenan por evaluá salú general di nan ekosistemanan.

Banda di esaki para ta hunga un ròl krusial den ekosistema di e islanan, por ehèmpel pa medio di polinisá flor i plama simia i nan ta enfatisá kon importante áreanan protehá ta pa sierto espesienan vulnerabel ku un área restringí kaminda ta topa ku nan.

Pa medio di sigui e abundansia relativo i e komposishon di espesie di para den diferente tipo di medioambiente, por optené konosementu importante riba nivel insular, interinsular i regional.

Un di e metanan ta pa komprendé e abundansia

relativo di para mas mihó, tantu en general komo pa espesienan spesífiko. Pa medio di opservashon minusioso e proyekto akí ta bai purba distinguí patronchi i fluktuashon den kurso di vários temporada i tempu.

E fluktuashonnan akí no solamente ta indikadónan di bida di para, pero tambe ta duna un bista riba un dinamismo ekológiko mas amplio.

Aparte di esaki, durante henter aña e proyekto akí ta investigá komposishon di espesienan di para den diferente alrededor. Esaki ta duna e parkenan un mihó komprenshon di e manera ku ekosistemanan lokal ta evaluá i adaptá nan mes durante henter aña.

E esfuersonan i monitoreo ta yuda garantisá ku ta identifiká espesienan menasá na tempu pa influensia nan sobrebibensia riba término largu.

Kambio, òf ousensia di kambio, den grandura di e populashon di para, tambe por indiká sierto kambionan òf stabilitat den medioambiente.

Di e manera akí monitoreo di populashon di

para por konta nos mas tokante salú di naturalesa en general.

Esaki ta yuda e parkenan pa evaluá éksito di konservashon di naturalesa i sí ta nesario adaptá e medidanan di maneho.

Metodologia

Na aña 2022 DCNA a ofresé personal di parke e posibilidat pa asistí na e tayer di PROALAS pa monitoreo di para na Repùblika Dominikana, organisá pa BirdsCaribbean. Via e grupo di trabou di investigashon i monitoreo di DCNA, e parkenan a skohe pa usa e protokòl di PROALAS komo un método standarisá di monitoreo pa para.

Danki na e protokòl standarisá akí, e informashonnan ku a akumulá den e programa ta komparabel entre e islanan di Karibe Hulandes i ku sobrá di e área Karibense i region Suramerikano.

Dos biá pa aña ta ehekutá investigashon di para, spesífikamente na luna di mart i aprel, despues di temporada di yobida i na luna di òktober i novèmber promé ku temporada di yobida, na tur e seis islanan Karibe Hulandes.

Rangernan entrená di parke i otro ekspertonan di

para, ta ehekutá e investigashonnan akí.

Dikashon kompartí na siensia

E proyekto akí ta kontribuí na realisashon di e metanan stratégiko riba tereno di para i nan áreanan di biba komo parti di e plan di maneho di naturalesa i medioambiente di e ministerionan di agrikultura, naturalesa i kalidat di kuminda i infrastruktura i maneho di Awa.

A desaroyá e proyekto den konsulta ku Wageninigen University & Research, pa sòru ku por usé pa e raportahe tokante estado di naturalesa di Karibe Hulandes korespondiente. Ademas pa promové transparensia i kolaborashon, ta hasi tur e informashonnan akumulá aksesibel via Dutch Caribbean Biodiversity, Observation.org i BirdsCaribbean.

E dedikashon na kompartimentu di informashon ta surpasá frontera i ta sòru pa e esfuersonan impulsá pa siensia riba tereno di konservashon di naturalesa, no solamente ta na benefisio di e área di Karibe Hulandes, pero tambe di e komunidad sientífiko mundial.



Cuedi Services B.V.

ta buska

1 schilder stukadoor

- mester tin 3 aña di eksperensia

Pa mas inf. yama telefòn # **785-7384**

CONTOURGLOBAL



ta buska

- **Maintenance Manager**
- **Warehouse Officer**
- **Operator**

Pa mas informashon por email Juliette de Grijze na Juliette.grijze@contourglobal.com

Shishi ta kon a bai asina

Pa: Fittipaldi Pietersz:

KRALENDIJK -- Nelly Clarinda-Kock, bon konosí komo Shishi, ta kon a bai asina. Ta algun di e hopi preguntanan ku hende ta hasi momentu ku un hende fayesé.

Djasabra 7 di òktober mi a bai na VMBO pa kubri un aktividat, apertura ofisial di Adoptiegrootouder 2023-2024. Aya mi a topa basta hende ku mi konosé i mi a kuminda tur.

Shishi tambe tabata presente i mi a kumind'é meskos ku tabata e kaso, e otro hendenan. Mi konos'é, pasobra e ta bon amiga di mi mama i den Grupo Orashon Spiritu Santu. Tambe e ta den mas grupo spiritual. Mi a bai kas di Shishi pa

atendé algu pa korant algun luna pasá.

Durante presentashon di dosentenan, tokante e Adoptiegrootouder, miéntras Yùfrou Suzy Bergland-Balentin tabata papia, un persona den e sala a hasi e pregunta, dikon e potrèt di e señora ta riba e kaft di e buki di informashon i riba pantaya. Kisas e tin un motibu spesial.

Yùfrou Suzy a mensioná ta un bon pregunta i el a splika ku ta trata di potrèt di Shishi, e persona ku e dun'é idea pa kuminsá ku e proyekto di Adoptiegrootouder. E proyekto a kuminsá aña pasá i awor ta di 2 aña i e ta eksitoso. P'esei su potrèt ta riba e

kaft.

Tambe Yùfrou Suzy a mustra tur hende ken ta Shishi, pasobra e tabata sintá den e klas. Esaki ta un i e di dos ta momentu ku Yùfrou Suzy a bisa e motibu di Shishi su potrèt riba e kaft, mi a pensa un bes, p'ami saka potrèt kuné i skirbi algu ku nos a topa.

Esaki no a resultá, pasobra nan a separá e grupo i a pone mitar den un otro klas. Nèt Shishi tambe a resultá un di esnan ku ta bai den e otro klas. Mi a lur den e otro klas, pero mi a mira ku ya e guia tabata atendé ku informashon serka Shishi, pues mi a disidí pa no ta bai strobá nan i mi a bai kas.

Esaki a tuma lugá djasabra 7 di òktober mainta lat. Djadumingu mi ta yega kas for di misa, mas o ménos 24 ora despues di a mira Shishi, bon i alegre na skol, pa

tende ku el a pasa pa un otro bida. Bida asina ta. Forsa na famia ku e pèrdida akí. Dios konsolá famia su doló. Potrèt saká na skol, 24 ora promé ku Shishi a fayesé.



Gasolin ta baha diesel ta subi

KRALENDIJK -- 3 sèn.
Entrante 13 di òktober ta adaptá preis di benta pa kombustibel. Preis di gasolin ta baha ku 4 sèn, diesel ta subi ku 14 sèn i kerosin ta subi ku 3 sèn. Preis di bòter di gas grandi i di bòter di gas chikí, ta keda igual. E siguiente adaptashon di preis di kombustibel ta 10 di novèmber.

Partisipashon



Preis pa produktonan di kombustibel entrante 13/10/23

PREIS POR MAYOR

Gasolin	\$ 141.08	USD ct pa liter
Kerosin	\$ 112.00	USD ct pa liter
Gasòil	\$ 114.35	USD ct pa liter
LPG 100 lbs	\$ 46.12	USD pa silinder
LPG 20 lbs	\$ 9.58	USD pa silinder

PREIS POR DETAYISTA

Gasolin	\$148.00	USD ct pa liter
Kerosin	\$115.00	USD ct pa liter
Gasòil	\$118.00	USD ct pa liter
LPG 100 lbs	\$ 52.00	USD pa silinder
LPG 20 lbs	\$ 11.00	USD pa silinder

Gezaghèber
R.A. Oleana

Sekretario Insular
mr. C.J.L. Frans



Inlubidabel©

Pueblo Rinconcito

E tin tres sèt di yu ku diferente fam: Goeloe, Reina, Manuel. Rosa Petrona Goeloe, ku tabatin e beinam di Toto Korocho (e tabata kòrtiku i tabata kana kokochá), a nase na Rincon dia 31 di ougùstùs 1882 komo yu di Martha Goeloe. Martha tabatin mas yu. Dos di nan ku tabata tòg bon konosí riba e Boneiru di siglo pasá

tabata Domingo Johannes Ignacio i Modesta Gijsbertha Ignacio, kende tabata kasá promé ku e piskadó Bernardo Thielman. Nan a kasa dia 7 di desèmber 1921. Bernardo tabatin e beinam Bèrná bok'i lamchi. Despues ku Bèrná a muri Bèta òf Bètuchi, manera tabata yam'é, a kasa ku Eduardo (Wachi) Winklaar.

Den e parti mas nort di Antriol, pegá ku Mentor, tin un área chikitu ku kisas por yama Rinconsito, pasobra un famia prosedente di Rincon a biba aki. Famia Reina òf Goeloe, ku ta bon mirá mesun famia. E promé persona ku a establese su mes na e sitio aki, den un kas situá eksaktamente kaminda e snèkbar chines Ocho Ocho Snèk ta ubiká aktualmente, tabata Rosa Petrona Goeloe, kende despues ta usa e fam Reina, pa finalmente ta bira Manuel, despues di a kasa.

Bèta durante hopi aña a hasi trabou di limpiesa den ofisinan di gobièrnu na Playa.

Domingo (Dun) a nase dia 20 di desèmber 1895 komo yu di Martha i Frimencio Ignacio. El a kasa na 1924 ku Narsicia Luisita Adoptie, yu di Vesuvius Salcero i Clemencia Janga. Vesuvius tabata nabegante.

Na momentu ku Petrona a nase dia 31 di ougùstùs 1882 den distrito di Rincon ainda Martha tabatin e fam Goeloe. No tin un tata menshoná riba su akta di nase-mentu. Pues e tabata un di e hopi yunan no rekonosé na Boneiru. Di mes Petrona a haña e fam Goeloe.


Bèta i Dun sí a haña e fam Ignacio, pasobra Martha a kasa despues ku un hòmber di Kòrsou yamá Primencio Ignacio.

No ta konosí pa ki rason presis, pero masoméno na aña 1900 Petrona ta haña e fam Reina. No pasobra e ta kasa. Un posibilidad ta ku su tata, ku lo por tabata Reina, a rekonos'é despues. Petrona ta haña un yu hòmber na 1897 ku ta nase komo Goeloe. Ta trata di Carolus Macario Goeloe, kariñosamente yamá Caros òf Yochi. E

tabata un hòmber hopi kòrtiku di estatura.

Dia 18 di novèmber 1904 Toto ta duna lus na un yu hòmber yamá Baselio. E ta

haña e fam Reina. E tambe tabatin estatura chikitu meskos ku Carolus. Toto mes tambe tabata kòrtiku. Toto tabatin vários yu mas.



Yochi Goeloe




Baselio Reina

MONCHI & TONCHI

Mi a gosa e parada di bandera djárasen. Ta basta nashonalidat tin aki.

Awèl si, otro aña nos tambe ta bai. Pero awor tras di kua bandera nos ta bai?



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482
Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcendencia
Velli Gijsbertha
Edson Pietersz
Ibi Piar (deporte)

Layout
Maya Beaumont

Konsehero:
Bòl Antoin
786-6818
Aviso
avisobon@gmail.com

Aktividadat pa mucha

KRALENDIJK -- Bonaire Harbourside Mall a organista un aktividad di pintamentu di kara i wega pa mucha ku pintamentu riba papel.

E idea a bini pa organisá e aktividad, simplemente algu pa e muchanan kòrda

Regata. DJ Tony Real a animá e aktividad, pone poko músika pa esnan ku tabata partisipá i pasa den e sentro komersial.

Diferente hende a pasa specialmente pa wak e muchanan ku tuma parti na e aktividad.



Renata Domacassé a gana 250 dòler serka Curoil

KRALENDIJK -- Renata Domacassé a gana premio di 250 dòler kèsh djárason anochi riba esenario. Curoil Bonaire a pone e montante disponibel pa un hende por gana. Loke e mester a hasi ta buska un kos rondó manera un florin di ántes, ku tabata skondí na

e tralinan dilanti na Ofisina di Gobernashon.

Renata a sali di bon e anochi, pasobra el a kumpli un aña mas di bida i a haña e premio grandi akí. Sigur esaki a kita un peso grandi for di dje, kaminda e no mester a hinka man den su saku pa selebrá ku famia i konosí.

Renata tabata masha kontentu i a subi esenario tuma su premio serka Aimed Ayubi, e maestro di seremonia di e anochinan di Regata 2023.

Curoil a pèrkurá pa Renata a selebrá un bon fiesta, ku nunca mas e ta lubidá.



The most complete payroll and HR software in the Caribbean!

Payroll Pro
HRM

www.payrollprohrm.com

Download the mobile app!

Google Play App Store

Impreshonante parada di bandera

KRALENDIJK -- Djárason alrededor di Malecon tabata kargá ku hende i bandera pa kana yega na e esenario prinsipal pa apertura di Festival di Regata 2023.

Masha hende a forma parti di e parada i despues a subi esenario prinsipal na altura di Parke Wilhelmina.

Papi Cicilia a introdusí kada pais presente i a pidi pa tuma un minüt di silencio pa esnan ku ta sufriendo e dianan akí den e problema di guera.

Despues Papito Thomas komo hefe di SKAL, a bisa: “E aktividat akí ta importante. Diferente agrupashon musikal ta presentá i kantidat di hende ta bini huntu i celebrá. Nos komo SKAL ta kontentu mira kuantu hende aki. Nos ta kanando pa celebrá en grandi.” Diputado James Kroon a bisa: “E aña akí a kuminsá den chikitu, pero for di awor mi por bisa pa otro aña e festival ta bai bira grandi, manera ántes tabata e kaso. Pues for di djadumingu ta kuminsá ku

kos grandi. A firma pa sigui ku dos organisashon grandi, Jiwan di Massiv Production i Aqua Speed. Nan ta sigui ku e parti di selebrashon di Regata binidero. Di e manera aki nos ta garantisá un festival grandi i riba nivel.” Despues a sigui presentashon riba e esenario prinsipal pa promé biá e anochi ku agrupashon musikal Foyan Boys, ku a habri e anochi musikal. Hopi hende tabatin na e momentu den e área, gosando di e ambiente.





ERA a pone tur hende move

KRALENDIJK -- Mas lat anochi di djárason Festival di Regata a kontinuá ku presentashon di DJ Brian K, ku a pone bon ambiente riba esenario.

Despues ku Brian K a terminá riba esenario,

e Boneriano outéntiko a presentá riba esenario, ku agrupashon musikal ERA.

Hendenan a hala serka di esenario pa nan a gosa lo máksimo di e momentu.

Basta hende tabatin e anochi, manisé e siguiente día.



Toren di vigilansia na Sorobon i Lac

KRALENDIJK -- Ku un paso signifkante pa mehorá konservashon di medioambiente i enrikesé partisipashon di públiko, STINAPA a instalá dos toren di vigilansia na Sorobon i Lac.

E torennan akí ku tin un funshon dòbel, no solamente ta mehorá kapasidat di rangernan dediká di STINAPA pa patruyá e bahia, sino ta aksesibel tambe pa públiko, ofresiendó oportunidat sin igual pa opservashon di para.

E torennan di vigilansia di dos piso, ta ofresé bista panorámiko di un banda pa e otro banda di e bahia, ta brinda un punto di bista úniko pa bishitante. Sea gosando di e bunitesa eséniko di Boneiru su kosta, òf opservando e bida riku di para, e torennan tin e ophe-tivo pa krea un konekshon perfekto entre komunidad i e isla su maravianan natural.

STINAPA a konfia konstruksion di e torennan di vigilansia na e kontratista lokal TecGroup, un testimonio di nos kompromiso pa sostené komunidad. Dia 10 di òktober a pone fundeshi, prefabriká na Sorobon i na Lac otro siman.

A traha e torennan mes na Hulanda, usando palu resistente kontra wer. Esaki ta sigurá durabilidad frente Boneiru su kondishonnan

di klima duru. A skèdjel e proseso di instalashon pa fin di e siman akí na Sorobon i fin di otro siman na Lac.

E torennan di vigilansia ta parti di un proyekto mas grandi di ‘Lac pa semper’, ku ta enfoká riba restorashon di habitat i uso sostenibel den bahia di Lac.

E proyekto akí ta risibí fondo di The Caribbean OCT’s ‘Resilience, Sustainable Energy i Marine Biodiversity Programme’ (RESEMBID), un programa di 40 mion euro finansiá pa Union Europeo i implementá pa Expertise France, e agensia di koperashon di Fransia.

Ademas di e torennan di vigilansia, e proyekto ta inkluí tambe un kriadero di koral, parti di Reef Renewal Foundation Bonaire, restorashon di yerba di laman, un reevaluashon di zonifikashon den e bahia, inklushon di dos ranger dediká na bahia di Lac i tambe a inkorporá un boto nobo Reina Karkó, na e flota di STINAPA.

Ofresiendó bista panorámiko, e torennan ei ta brinda bishitante un oportunidat eksklusivo pa presensia e bida vibrante di ref di koral, e kamanan ekstenso di yerba di laman i e místika di pal’i mangel, segun Judith Raming, Manager di Parke Marino.





FKPD
Fundashon pa Kuido
di Personanan Desabilita

VACATURE

De organisatie:
De Fundashon Kuido pa Personanan Desabilita (FKPD) is een zorginstelling voor mensen met een verstandelijk c.q. fysieke beperking op Bonaire. FKPD telt 65 medewerkers en 95 cliënten verdeeld over verschillende afdelingen.
De instelling omvat onder meer een activiteitencentrum, woonvoorzieningen, waaronder 2 trainingshuizen voor LVB'ers en een dagbesteding voor kinderen, volwassenen en een naschoolse opvang voor kinderen.

SOCIAAL WERKER (M/V)
0.6 - 0.8 fte

Functie:
Het bieden van materiële en immateriële begeleiding aan cliënten en hun familie met psychosociale, emotionele en/of materiële problemen. Alsmede het bieden van dergelijke begeleiding aan onze medewerkers.

De functie-eisen:

- In het bezit zijn van een diploma MBO – Sociaal maatschappelijk dienstverlener niveau 4 en/of vergelijkbare opleiding en ervaring.
- Ondersteunt cliënt/naast betrokkenen bij het voeren van de regie (huisbezoek/ werkbezoek)
- Verricht personeelsbegeleiding op (psycho) sociaal vlak
- Heeft inzicht in de opname procedure en neemt een intake af met aangemelde client en naasten.
- Onderhouden van netwerk met andere zorginstellingen zoals MHC, ZW-groep, EOZ, AKSESO, SGB, ZJCN, CJG etc.)
- Beheert de wachtlijst van potentiële cliënten
- Speelt een belangrijke rol bij het organiseren van collectieve betrokkenheid van ouders en naasten
- Neemt deel aan het Multidisciplinair team
- Relevante werkervaring in de zorg is een vereiste
- Liefde hebben voor het begeleiden van verstandelijk gehandicapte personen.
- Zelfstandig en in teamverband kunnen werken.
- Kunnen omgaan met agressie en conflicten
- Bereid zijn om bijscholingsprogramma's te volgen.
- In het bezit zijn van een geldig rijbewijs (B).
- Kennis van papiamentu is een prioriteit

Wat bieden wij:

- Arbeidsvoorwaarden conform CAO FKPD.
- Het salaris is afhankelijk van (werk)ervaring en opleiding.
- Secundaire arbeidsvoorwaarden zoals vakantietoelage en eindejaarsuitkering
- De arbeidsovereenkomst wordt in de eerste instantie voor 1 jaar geboden met de intentie deze daarna te verlengen.
- Indien van toepassing, worden ticket- en verhuiskosten in samenspraak met het FKPD vergoed.

Informatie:
Wilt u meer informatie over Fundashon Kuido pa Personanan Desabilita dan kunt u de website bezoeken: www.fkpd.org

Procedure:
Belangstellenden kunnen reageren tot en met **31 oktober 2023**. De sollicitatie (*brief en CV in één document*) kan verstuurd worden naar het volgende e-mailadres: afdeling HR, hr@fkpd.org
Voor inhoudelijke vragen over de vacature kunt u contact opnemen met mevrouw drs. Edilse Goeloe, directeur, edilse.goeloe@fkpd.org

Essentials Boutique B.V.
ta buska
1 schoonheidsspecialiste
- mester tin 2 aña di eksperensia

Pa mas inf. yama telefòn # **700-3589**

INTERNASHONAL
Dil di migrashon parse ainda hopi leu

Tunesia ta debolbé sèn

TUNESIA – Tunesia a nenga un suma di 60 mion na plaka di ayudo Europeo i a debolbé esaki riba kuenta Europeo. Fuentenan di Komishon Europeo, a konfirmá esaki na NOS.

Ta trata di plaka ku Tunesia a haña anteriormente ku a bini for di e

krisis di Corona, pero e kuestion ta keda tresé den relashon ku e dil di migrashon di Union Europeo ku Tunesia.

En kambio pa e sosten ekonómiko, e pais mester limitá e kantidat di migrante ku ta krusa via Tunesia i Laman Me-

diteráneo.

Tokante e plaka, tin un pleitu habrí entre Tunesia i Europa. E gobièrnu di Tunesia ta deskribí e plaka komo un tep. E pais ta bisa di ta pará habrí pa koperashon serio, pero no ta aseptá asina fásil dor di karidat.


Diplomasia òf akshon di reskate?

Krísis di sekuestro Gaza ta èkstra kompliká

GAZA – Plamá riba e frontera di Gaza, desde

djasabra Hamas ta tene na kalkulashon un 150 hò-

ber, muhé, mucha i adulto mayó asina, sekuestrá i pr-

ezu. “E situashon ta hopi preokupante,” èks minister di asuntunan eksterior, Ben Bot, ta bisa. “E grupo di sekuestro akí ta e viktoria di mas grandi ku Hamas tin.”

Aparte di Israelí, e moveshon terorista tin tambe kantidat di hende for di eksterior den su poder. I tur e paisnan akí tras di kortina ta pone preshon riba e gobièrnu na Jerusalem pa

haña nan siudadanonan seif bèk. Sí tin asina nashonalidat enbolbí, ta hasi e situashon èkstra kompliká.

Kon bo ta hasi di salba kantidat di hende ku posiblemente nan bida ta na peliger den un zona di guera. Ekspertonan ta yama e purá imposibel pa libra asina tantu hende den un área manera Gaza bou di e sirkunstansianan akí ku akshon di reskate.


Despues di hopi luna

Jackpot loto Merikano di 1,7 miar dòler ta kai

MERKA – E jackpot ta mas haltu nunca anterior na Estádos Unídos di 1,73 miar dòler, a kai. Tokante e ganadó di e loto di Powerball, solamente ta konosí ku e ta di California.

A kumpra e loto ganadó den Frazier Park, un lugá entre Los Angeles i Bakersfield. E jackpot tabata asina

haltu, pasobra e último 35 sorteo no tabatin ganadó, pues a sigui akumulá.

E ganadó mester skohe sí e ke e premio pagá durante un periodo di 30 aña, òf e suma den un solo biá. E ora ei e premio ta algu sí mas abou, den e kaso akí un 750 mion dòler asina. Mayoria ganadó ta skohe pa e último

opshon.

E jackpot di mas haltu nunca anterior, kasi dos

miar dòler, a kai na novèmber aña pasá tambe na California. E chèns riba e

premio grandi serka loto di Powerball, ta 1 riba 292 mion.



STATIA/SABA/ST. MAARTEN

Konmemorashon 13 aniversario Dia di Konstitushon



ARUBA

Accidente pisa entre brommer y auto

ORANJESTAD -- Di aranson marduga algo prome cu l'or, polis y ambulance ta wordo alerta di un accidente pisa ariba e crusada di Adriaan Laclé Boulevard cu L.G.Smith

Boulevard. Brommer cu auto. Tawata trata di un Kia Picanto shinishi y brommer marca BMW S1000R. Ariba e brommer tawata tin dos persona, un cabayero y un dama. Ambos a ser haya

den situacion serio benta ariba caminda.

Na e sitio nos a papia cu dos testigo. Ambos tawata tin un version. Segun un di e testigonan; e brommer no tawata biniendo cu luz y e

segun e otro testigo e brommer tawata tin su luz cendi.

Na e sitio nos a compronde cu e Kia Picanto tawata bayendo direccion pariba y e brommer lo tawata biniendo cu velocidad bayendo pabou. Eynan ta sosode un impacto frontal; unda cu e brommer BMW casi nada a resta di dje, y unda e dama ariba dje ta bay cay como un 30 pa 50 meter mas pabou ariba acera. E cabayero a keda benta mas cerca di e brommer. Varios partinan di e BMW a spart meternan leu; di unda e impacto tawata. Tres ambulance a presenta na e sitio unda cu rapidamente a prepara e dama y sali cu maximo urgencia direccion Hospitaal. Despues un otro ambulance a sali cu e cabayero. Algun

departamento a wordo notifica y por a mira manera BFTO (departamento tecnico) y tambe Specialista di Trafico, Fiscal y Hefe di Trafico. Pues full un investigacion a cuminsa e ora ey, mirando e magnitud di e accidente.

Chauffeur di e Kia Picanto a wordo deteni na e sitio, y ta wordo hiba den patruya mes pa warda, unda cu lo bay haci otro test mas di alcohol cu ne. Paramediconan mester a haci un check up cu un di e testigonan, debi cu e la bira malo di locual e la presencia.

E accidente aki ta sosode exactamente unda tin un cruz, di un accidente di brommer cu a sosode un 2 año y mey pasa cu resultado fatal.



Hincamiento formal na Parkietenbos

ORANJESTAD -- Diamars, 10 di october, pa mas of menos 7:35 di mainta,

polis a bay cu urgencia direccion di Parkietenbos relaciona cu un caso di hincamiento.

Eynan a bin topa cu un otro patruya, cu tabata sigurando e luga di e

echonan. Poco despues, a informa a traves di central di polis, cu e sospechoso envolvi den e hincamiento, tabata na Ecotech situa na Barcadera.

E sospechoso a horta un truck y a purba di huy. Eynan polis a papia cu un manager di Ecotech den cuadro cu e informacion anterior. El a declara cu no a inform'e di e caso. Poco despues, otro empleado di Ecotech a acerca y a menciona cu e sospechoso tabata panort di e edificio.

Polis e momento ey a bay n'e luga di e incidente. Eynan a mira un homber den un truck. Tabata trata di un conocido di polis y di husticia yama C. C. tabata completamente sunu y muha y por lo tanto, soda

Polis a exigi C p'e sali for di e truck, cual exigencia e no a cumpli cu ne. A purba di saca C. for di e truck, pero esaki a tira su mannan den direccion contrario. Como reaccion riba esaki, polis a gara C. cu ambos man, a sac'e for di e truck y a bente abao di biaha. A tuma luga un forsego caminda cu polis a wanta C. na su brasa y pianan y el a muestra resistencia p'esaki. Despues di e informe menciona, a detene C. panort di Ecotech.

Despues di su detencion un otro empleado di Ecotech a aparece y a declara cu C. a purba di horta un otro truck. E sospechoso no tabatin paña, pa cual no a haya nada relevante. A pone central na altura.

Cas cu a kima ta pertenece na conocedo recidivista

ORANJESTAD -- Diamars anochi algo prome cu 8'or 911 ta haya informacion cu lo tin un cas na candela na San Fuego. Polis na su yegada a bin topa enberdad cu un candela grandi na e dicho adres. Algun

rato despues dos unidad di Brandweer a presenta y tambe OVD.

Den algun rato nan a domina e candela. Segun nos por a compronde lo ta trata di e cas unda e recidivista Jean Pierre Croes ta biba.

Dos chabalito a horta pickup na Savaneta

ORANJESTAD -- Diamars, den careda di 3'or di marduga, central di polis a informa cu un joyriding a tuma luga y cu un hende lo tabata persiguiendo e auto marca Ford, modelo Sport Trac, colo shinishi. Fuera di esey central a informa cu fuera di esey, dicho auto tabata para cerca di Caya Corsou y cu dos mucha homber lo a huy den dje.

Un di e hobennan tabatin un sweater colo cora cu hoodie y carson cortico, di colo cla, mientras cu e otro tabatin un flanel colo blanco y carson cortico. E hobennan a huy den un direccion desconoci.

Yegando cerca di Caya Martinique, e agentenan a mira dicho auto para memey di caminda. E portanan di chauffeur y di pasahero tabata habri y e luznan

tabata cendi. E yabi di e auto tabata na e starter. A controla den e cayanan di Village y den vecindario di San Nicolas, pero no a bin topa cu ningun hende cu e descripcionnan duna di e sospechosonan. A avisa personal di BFTO. A confisca e auto y hib'e a warda si Santa Cruz pa un investigacion mas detaya. A tuma declaracio di e doño di dicho auto.

Homber a coy yabi di dama pero a entreg'e bek

ORANJESTAD -- Diamars, den careda di 2'or y mey, un dama a presenta na ward'i polis di Shaba, caminda cu el a declara cu e tabata den supermarket cerca di 10'or y 15 di mainta y a laga yabi di su auto Kia Rio colo blanco, riba balie.

Na dado momento, el a scucha manera un hende lo a bay cu un yabi. E no

a mira esaki. E momento ey el a descubri cu yabi di su auto no tabat'ey ningun caminda. El a puntra un trahado n'e sitio si el a mira un hende cu por a bay cu su yabi. Dado momento el a bay n'e porta a habri esaki y a wak pafó, pero no a mira ningun hende. Mientras cu e dama tabata papia cu e trahado Chines, un homber desconoci a

acerc'e di patras. Ora cu el a draai, el a mira e homber tabata purba di entreg'e e yabi, splicando cu el a haci un fout y a coy accidentalmente su yabi di auto. E homber tabatin cuero bruin, mustashi, tabatin bril bisti, cabey preto y tabatin un carson largo colo bruin seur y un camisa di manga cortico bisti. A avisa central riba esaki.

HULANDA

Despues di kombersashon ku Palestinonan

Bandera di pas na Kas di Estado Vlaardingen

VLAARDINGEN – Na Kas di Estado di Vlaardingen 12'or di mèrdia a hisa bandera Israelí i un bandera



di pas. Esaki ta e resultado di un kombersashon ku Burgemeester Wijbenga i un grupo di Palestino bibá na Hulanda.

Vlaardingen ta e siudat ku e komunidad mas grandi di Palestino na Hulanda. Segun Wijbenga, un riba 15 habitante di su siudat, tin relashon esaki.

E siudat na Rotterdam, meskos ku otro siudatnan, ku e bandera Israelí ke duna

sosten na Israel despues di e echonan di terorista di Hamas. E komunidad Palestino no ta kontentu ku e desishon. Un representante ta papia di un insulto de-generá na direkshon di Palestinonan bibá na Hulanda, pasobra e bandera Israelí ta pará pa nan pa opreshon.

Djamars anochi tabatin un kombersashon i Wijbenga i 12 representante di e komunidad Palestino na

Vlaardingen. Esaki a dura un dos ora i mei asina i segun e burgemeester a terminá emoshonal.

E resultado pues ta ku e bandera Israelí ta den tòp di e kas di estado pa despues di un dia traha lugá tambe pa e bandera di pas. Esaki ta un bandera blou ku riba dje un paloma blanku. Na balkon di e ofisina di Wijbenga ta bai bin un bandera Israelí i Palestino hisá.

Nuebe luna di prizòn pa sèks pagá ku mucha di 13 año

BREDA – Ku awa na wowo T. di 34 año tabata sintá dilanti Hues. Na yùli 2020 el a hasi un fout grandi dor di tabatin sèks ku un mucha muhé di 13 año. “Pero realmente mi no



tabata sa ku e tabata asina yòn.”

Yen di nèrvio e hòmer tabata sintá djamars dilanti Hues. Sèks ku un mucha di 13 año semper ta kastigabel, sea bo sa su edat òf nò. I T. tin hopi di pèrdè. E ta tata di un famia yòn i un kastigu di prizòn por pon'é pèrdè su trabou i kisas mas.

“Mi a hasié,” T. ta lamentá. “Mi tabatin un bida normal ku un bon trabou i awor mi ta sospechoso den un kaso asina.”

T. no ta e úniko ku ta den Korte pa sèks ku e mucha di

13 año akí. Na yùli 2020 ainda tabatin tres hòmer ku a hasi sèks ku e mucha den e bario Tuinzigt den Breda.

Djaluna Ministerio Públiko a eksigí kuater año di prizòn pa e sospecho prinsipal i sabiendo ku e promé kliente djamars mainta ya a tende un kastigu pidí di 12 luna, T. ta kuminsá ku su kaso.

“Ku e tabatin 13 año realmente mi no tabata sa,” T. a bisa. E tin duele enorme ku e paso robes ku el a tuma. El a splika Hues ampliamente kon esaki por a tuma lugá: “Na kas no tabata bai asina bon entre ami ku mi kasá i mi tabatin nesesidad na kontakto físiko. Riba Kinky.nl mi a mira un Xenna di Breda i via Whatsapp a regla un afspraak.”

T. a akudí na e apartamentu i e mucha di 13 año lag'é drenta. E mucha tabata bistí ku paña sèksi i ku hopi makiahe no tabata mustra asina yòn, T. a indiká atrobe. “Mi tabata nèrvioso, pasobra esaki tabata e promé biá ku mi a paga pa tin sèks.”

Mas di e sala i kamber, T. no a haña nada mas pa mira. I despues di un sèks lihé ku e mucha muhé, ya e tabata pará pafó.

Dos año i mei no tabatin nada, pero un dado momentu un karta di Hustisia

a yega na T. su kas. Kurioso su kasá a habri e karta i a lesa ku e mester akudí na Polis. E momentu ei numa T. a haña tende ku e tabatin sèks ku un mucha di 13 año.

Hues a bisa ku muchanan yòn no mester bira víktima i pues mester ta protehá dor di un kastigu di prizòn inkondishonal kontra hòmbenan ku ta hasi mal uso di e muchanan akí.

Fiskal no ta kompromné dikon T. a tuma un rísiko asina dor di kai den

tentashon via un aviso riba Kinky.nl. Mihó el a bai un empresa ku pèrmit kamin-da ta traha ku muhé riba 18 año.

T. a spanta ku e eksigensia di 9 luna di prizòn. Desde ku e ta sospechoso e tin kehonan síkiko, pero su kasá i famia ta sosten'é. Awor e mester warda ainda shete siman promé ku e tende ki kastigu e ta haña. Riba e dia ei tres otro kliente tambe ta haña tende nan kastigu.

Kakalaka ta invadí kaya den Tilburg

TILBURG – Habitantenan di Lombardijenlaan den Tilburg, tin molèster ku plaga di kakalaka. E insektonan akí na kantidat grandi ta invadí kas i kaya. “Nan ta subi outo tambe,” un habitante a bisa Omroep Brabant. “I sí mainta bo habri porta di outo, henter e rant ta yen di kakalaka.”

“Mi ta haña grawata-



mentu pa esaki,” un otro habitante a bisa.

“Tambe realmente mi a drumi malu. Nan ta gewon na bentana di bo kamber.”

Segun e habitantenan, e kakalakanan ta bini for di sistema di riol ku mester ta mantenshon urgente. Segun e habitantenan, e sistemanan akí ta paraiso pa kakalaka.

Inspekshon desapuntá

Kalidat eksámen ainda insuficiente

HULANDA – Ketu bai e kalidat di eksámen di skol na skolan sekundario no ta na òrdu, a sali na kla for di un investigashon di Inspekshon di Enseñansa.

For di e rapòrt, ku ta bai durante e año eskolar ku a pasa, ta bin dilanti ku un terser parti di e seshonnan di skol investigá, ta presta bou di nivel. No tur momentu ta tèst e materianan obligatorio i hopi biá a komishonnan di eksámen tin muchu tiki bista riba e kalidat di e eksámennan di skol.

Serka 37 porshento di e 127 skolan investigá, no por a haña e programan di tèst di e mate-

rianan obligatorio, PTA. Den mayoria kaso ya anteriormente a tèst e materia obligatorio, por ehèmpel den práktika, kaminda seguidamente a bini muchu tiki dilanti di e PTA.

Serka 1 di kada 8 skol, kasamente no a tèst e materia obligatorio. E skolan no tabatin e materia obligatorio bon na bista, òf tabatin retraso durante ehèkushon di e eksámennan.

Inspekshon di Enseñansa ta desapuntá den e resultadonan di e investigashon, apesar ku nan a mira mehorashon kompará ku e investigashon anterior di 2019.

Min.Cijntje a reuní ku partnernan riba

Solushon temporal pa piskadónan

WILLEMSTAD—Resientemente Minister di Desaroyo Ekonómiko a reuní huntu ku Hans i Saskia di Casha, Fred di Duikschool, Erwin Koense i Victor representando piskadónan i ku Muryad de Bruin di Ofisina di Turismo. Meta di e reunion tabata pa resolvé problema di piskadónan.

Mirando e problemátika kaminda sambuyadónan ta kòrta i hasi daño na reda i material di piskadónan den área di Rif/Aqualectra, a yama e reunion pa sinta i bini ku un solushon den korto tempu. Ke evitá ku e situashon lo sali for di man

entre e piskadónan lokal i turista/sambuyadó.

A yega na un akuerdo ku ofisina di Turismo huntu ku representante di Casha i piskadónan ku ta bai wak e áreanan kaminda por pone bòrchi di informashon indikando unda e sambuyadónan por baha na laman. Pa medio di bòrchi lo indiká pa no mishi ku material di e piskadónan. Tambe lo bai traha riba un punto di kontakto kaminda piskadónan por mèldu. Ora nan tin reda den laman lo mèldu esaki na Politur pa asina por tin mas control den e áreanan.



Dos aniversario na Ministerio Públiko

WILLEMSTAD—Dia 15 di sèptèmber a kumpli 25 aña ku Guillano Schoop a drenta den servisio di Ministerio Públiko komo fiskal Interino. Dos siman despues, riba 1 di òktober, Clarelli Hato-Willems a

selebrá su 30 aniversario. Esaki tabata motibu pa selebrá djabièrnè 6 di òktober huntu ku e kompañeronan di ministerio públiko.

Hefe ofisial Heiko De Jong, a entregá nan algun opsekio.



Detenshon relashoná ku kas ku a kima ku dos morto

WILLEMSTAD--Relashoná ku investigashon den e kaso ku a tuma lugá dia 25 di ougùstùs e aña aki, unda un kas a kima i laga un saldo di dos morto, reshèrshinan di e tim ku ta enkargá ku kasonan di homisidio, a hasi un detenshon.

Djárason 11 di òktober alredero di 06.15'or, polis a detené e hòmber sos-

pechoso Q.O.B. di 48 aña di edat nasé na Kòrsou.

Su detenshon a tuma lugá na su kas den Montaña Abou. Na e adrès en kestion a konfiská diferente artíkulo balioso pa e investigashon.

A presentá e sospechoso dilanti di un fiskal ouksiliar ku a ordená su enkarselamentu pendiente di mas investigashon.



Kontra amtenarnan

No ta aseptá menasa di trahadónan di transporte

WILLEMSTAD – Ministerio di Tráfiko, Transporte i Planifikashon Urbano (VVRP) a konstatá ku den último dianan personanan ku ta laborá den sektor di transporte públiko a menasá ámtenarnan di Servisio pa Tráfiko i Transporte (UOVV). A bai asina leu di drenta den espacio privá di e ámtenar en

kuestion menasando e pa loke ta trata atendentu di nan pèrmit.

Gobièrnu no ta tolerá esaki. E ámtenar a hasi denuncia na Polis pa e aktonan. VVRP ta indiká ku na momentu ku por konstatá ta ken ta e personanan ku a hasi nan mes kulpabel na e aktonan, lo skòrs e personanan ei, i/òf kita nan pèrmit. Di e forma aki, e per-

sonanan enkuestion lo no por sigui laborá den sektor di transporte públiko. Lo hasi esaki den estrecho koperashon ku Polis. E komportashon ta unu kompletamente inakseptabel. VVRP ta duna advertensia serio kontra tipo di aktonan asin'aki.

Di awor en adelante, lo kita pèrmit di tur ku komportá di e forma baho aki.

Brain a topa hendenan di COMCABON

KRALENDIJK -- Brian Kamperveen a presentá na Karel's Beach Bar djárason 11 di òktober i a rekonosé tur su hendenan di COMCABON. Nèt e momentu e organisashon di

kareda tabata atendiendo ku e kareda di pia den Regata.

Brian ta kòrda tur su hendenan i nan a salud'é ku masha apresio, ku e ta bèk na Boneiru for di Hulanda.

Brian a pèrkurá pa un ambiente èkstra na e sitio i petishon pa sakamentu di potrèt no a keda afó.

Asta polisnan, su amigunan, a pasa kuminda.





Brandweerkorps Caribisch Nederland

DETEKTOR DI HUMA TA SKAPA BIDA

Mayoria víktima ku kai den kaso di kandela ta dor ku nan ta hala huma aden. Un detektor di huma ta alarmá bo na momentu ku e detektá huma. P'esei un detektor di huma por skapa bo bida.



Bo tabata sa ku

- bo no por hole nada miéntras bo ta na soño, pues huma tampoko?
- un detektor di huma ta alarmá bo i ta sòru pa bo tin tempu pa hui?
- un detektor di huma no ta aktivá sin mas ora bo huma un sigaria?
- por instalá un detektor di huma fásilmente, mayoria biaha esaki ta kosta 1 minüt?
- bo por kumpra un detektor di huma den un pakus di konstrukshon i di elektrónika?
- dor di partisipá na e quiz di BKCN bo por gana un di e dies un detektornan di huma?

Pa mas informashon tokante un detektor di huma i e quiz, wak riba www.rijksdienstcn.com

Komèr i kompèr bon ku otro

KRALENDIJK -- Komèr i kompèr a topa na Jong Bonaire djaluna anochi durante inskripshon di Caribbean Rockets 2nd Annual Regatta Charity Ride 2023.

Nan ta bon ku otro, pero no manera sa bisa, nan ta biba bon ku otro. Tin un diferencia grandi.

Asina nan ta madrina i padrino di Marchel Coffie.



Famia Ranis-Muller

Desendientenan boneriano na Aruba den Herensia

KRALENDIJK- E promé programa Herensia di e siman aki na Bonaire.tv invitadonan ta famia Ranis-Muller bibá na Aruba. Na mei último e ekipo di Herensia a bishitá e famia aki pa papia ku Zenaida Ranis-Muller i su yunan Tessely

Koolman-Ranis, Esther Ranis i Shurby Ranis.

E yunan ta nasé na Aruba i e mayornan na Boneiru. Pero semper nan a mantené laso ku Boneiru.

E programa ta pasa awe djabièrnè pa 8'or di anochi.



CS35 PLUS

1.4T BENZINE | 260Nm TORQUE | AUTO TRANS. | 158 HP



\$22,995 discount price

SERVICE & PARTS GUARANTEED

CS55 PLUS

1.5T BENZINE | 300Nm TORQUE | AUTO TRANS. | 185 HP



discount price **\$25,995**

5 YEAR WARRANTY